

Na osnovu člana 13. Zakona o principima lokalne samouprave u Federaciji BiH («Službene novine F BiH», broj: 49/06) i člana 34. Statuta općine Zenica («Službene novine Općine Zenica», broj: 3/98 – prečišćen tekst i 6/99), Vijeće općine Zenica na tridesetpetoj sjednici održanoj 28.decembra 2007.godine, utvrdilo je

ETIČKI KODEKS ZA IZABRANE ZVANIČNIKE OPĆINE ZENICA

I – UVODNI DIO

§ 1.

Ovaj Etički kodeks (u daljem tekstu: Kodeks) sadrži principe za lokalne javne zvaničnike.

§ 2.

Predmet ovog kodeksa su osnovni principi standardizovanog ponašanja, što građani očekuju od izabranih predstavnika u vršenju njihovih dužnosti, a što će održavati i snažiti povjerenje građana prema institucijama, u funkciji općeg interesa.

II – PRIMJENA KODEKSA

§ 3.

Kodeks se odnosi na sve izabrane lokalne zvaničnike, kojima je mandat povjeren putem neposrednih ili posrednih izbora, odnosno imenovanjem.

§ 4.

Termin «izabrani zvaničnik» označava bilo koju osobu kojoj je mandat u općinskim organima i tijelima povjeren neposrednim ili posrednim izborom, odnosno imenovanjem.

III – OSNOVNI PRINCIP PONAŠANJA

§ 5.

Izabrani zvaničnici, davanjem svečane izjave, ili imenovanjem u svim slučajevima moraju se pridržavati ustava, zakona, Statuta Općine, Kodeksa ponašanja i drugih propisa, zanemarujući političku naklonost.

§ 6.

U vršenju povjerene funkcije, izabrani zvaničnici radit će u općem interesu, zalagati se za ljudska prava i slobode, ravnopravnost naroda i gradjana.

§ 7.

Izabrani zvaničnici će obavljati povjerenu funkciju i dužnost savjesno i odgovorno, uz naglašenu otvorenost i spremnost da odgovaraju za svoje odluke, djelovanje i ponašanje.

§ 8.

U obavljanju svojih dužnosti, izabrani zvaničnici će uvažavati prava i ovlaštenja drugih izabranih zvaničnika, suzdržavajući se od podsticanja ili pomaganja u izvršavanju povjerenih dužnosti radi dovođenja u privilegovan položaj sebe ili drugih izabranih zvaničnika.

IV – POSEBNE OBAVEZE

§ 9.

Izborna kompanja

Kandidat za odredjenu funkciju u toku kampanje težiće da glasove birača pridobije poštenim i argumentovanim istupom isticanjem svojih kvaliteta i rezultata, bez nekorektnog odnosa prema ostalim kandidatima u kampanji.

§ 10.

Zabrana favorizovanja

Izabrani zvaničnici neće zloupotrebjavati svoja ovlaštenja u svrhu vlastitog interesa i interesa drugih pojedinaca ili grupa.

§ 11.**Sukob interesa**

Pored zakonske obaveze kada je izabrani zvaničnik obavezan da se uzdrži od vijećanja i glasanja u određenoj pravnoj stvari kod izabranog zvaničnika postoji i moralna obaveza da se zbog ličnog ili poslovnog interesa uzdrži od naprijed navedenih radnji i da na to ukaže prije otvaranja rasprave po tom pitanju.

§ 12.**Lične nadležnosti**

Pri obavljanju diskrecionih ovlaštenja, izabrani zvaničnici neće za sebe ni za druga lica pribavljati koristi niti bilo kakve pogodnosti.

§ 13.**Donošenje odluka**

Odluke izabranih zvaničnika, u vršenju funkcije zasnivaće se na principima zakonitosti, objektivnosti, odgovornosti i otvorenosti i usklađenosti s javnim interesom.

Izborni zvaničnici prihvataju odgovornost za svoje odluke u izvršavanju povjerenih im dužnosti.

§ 14.**Način komuniciranja**

Izborni zvaničnici u ostvarivanju komunikacije izbjegavaće sve oblike obmanjivanja, manipulaciju, samopromociju i neučtivost u kreiranju i vođenju dijaloga.

§ 15.**Poštivanje konvencije**

Izabrani zvaničnici dužni su poštovati odredbe Evropske konvencije o zaštiti ljudskih prava a naročito kada je u pitanju zaštita privatnosti.

§ 16.**Povjerenje javnosti**

Izabrani zvaničnici treba da usmjere svoje ponašanje u skladu sa javnim interesom, da izbjegavaju konflikte i snaže povjerenje javnosti prema državnim institucijama.

§ 17.**Zabrana korupcije**

Ovaj Kodeks isključuje prihvatanje mita i svakog drugog ponašanja što bi se prema važećim propisima moglo podvesti kao aktivno ili pasivno podmićivanje, te korištenje javne funkcije za privatni interes.

§ 18.**Upravljanje resursima**

Od izabranih zvaničnika se očekuje da javnim resursima i finansijskim sredstvima upravljaju na efektivan, efikasan i ekonomičan način isključujući njihovo korištenje u privatne svrhe.

§ 19.**Finansijska disciplina**

Izabrani zvaničnici ne mogu djelovati kao plaćeni zastupnici, pogrešno koristiti isplate ili naknade u oblastima upravljanja javnim prihodima.

V – ODNOSI PREMA OPĆINSKOJ UPRAVI**§ 20.**

Vlastitim ponašanjem, izabrani zvaničnici onemogućit će imenovanje službenika i namještenika suprotno zakonskim propisima.

§ 21.

Javni zvaničnici će podsticati i razvijati motivacione elemente da svi zaposlenici rade brzo i efikasno, stručno i odgovorno, zakonito i kreativno.

VI – OBLAST NADZORA**§ 22.**

Izabrani zvaničnici neće sprečavati bilo koju mjeru nadzora koju budu vršili nadležni organi, uz uvažavanje izrečene privremene ili konačne odluke donesene u postupku nadzora.

§ 23.

Izabrani predstavnici biće odgovorni građanima Zenice, u mandatnom periodu na koji su izabrani, za svoj rad i djelovanje.

VII – PRAĆENJE KODEKSA PONAŠANJA

§ 24.

*Praćenje i nadziranje poštivanja Kodeksa ponašanja izabраних званичника вршиће **Etička komisija**, imenovana od strane Vijeća općine na prijedlog Komisije za izbor i imenovanja.*

§ 25.

Komisija iz prethodne tačke broji 9 članova a čine je predstavnici Vijeća općine, nevladinog sektora i ugledni građani.

§ 26.

Komisija donosi Poslovnik o svom radu.

VIII – ŽALBENE PROCEDURE

§ 27.

Građani imaju pravo i mogućnost podnositi predstavke i žalbe za kršenje pravila ovog kodeksa.

§ 28.

Predstavke i žalbe podnose se u pisanom obliku i moraju biti potpisane.

§ 29.

Prijava za kršenje kodeksa ne može biti anonimna i mora sadržavati ime podnosioca prijave i kontakt adresu. Prijava se dostavlja isključivo u zatvorenoj koverti sa naznakom za Etičku komisiju.

§ 30.

Identitet podnosioca prijave ostaje poznat članovima Etičke komisije i zvaničnika na kojeg se odnosi do okončanja provjere. O eventualnom otkrivanju identiteta podnosioca prijave, nakon provedenog postupka provjere, odlučuje Komisija.

§ 31.

Anonimne prijave komisija neće razmatrati.

§ 32.

Ako komisija zaključi da prijava nije kompletna niti dovoljno jasna, može zatražiti od podnosioca prijave dodatne informacije.

§ 33.

Ako komisija primi prijavu koja se odnosi na kršenje zakona i drugih propisa dužna je obavijestiti podnosioca o nadležnom organu za postupanje po toj prijavi.

IX – PROVJERA**§ 34.**

Komisija će pokrenuti provjeru navoda iz predstavke i žalbe u roku od 30 dana od dana prijema podnesene pismene prijave.

§ 35.

Osoba na koju se predstavka i žalba odnose treba biti odmah obaviještena o prijavi u roku i dužna je da u roku od 15 dana odgovori u pisanoj formi ili da obezbijedi informacije (dokumente koje smatra relevantnim za svoju odbranu).

§ 36.

Komisija može pozvati osobu na koju se predstavka i žalba odnose da podnese dodatne informacije koje se odnose na prijavu.

§ 37.

Podnosilac prijave će takođe biti pozvan da odgovori na pitanja članova Komisije odnosno dodatno obrazloži navode iz svoje prijave.

§ 38.

Eventualni svjedoci predloženi od strane podnosioca prijave ili osobe na koju se prijava odnosi mogu biti pozvani na razgovor.

§ 39.

O cijelom toku postupka pred Komisijom vodit će se zapisnik o čemu se stara Stručna služba Vijeća i Načelnika.

§ 40.

Zapisnici se čuvaju u arhivi Komisije u Stručnoj službi Vijeća i načelnika.

§ 41.

O činjenicama i rezultatima provjere Komisija će sačiniti izvještaj koji će dostaviti Vijeću općine i osobi na koju se prijava odnosi.

§ 42.

Ako je Komisija zaključila da je prekršen Kodeks, izvještaj će sadržavati i predložene sankcije.

§ 43.

Vijeće općine razmatra izvještaj Komisije zajedno sa predloženim sankcijama o čemu donosi zaključak.

§ 44.

Na dijelu sjednice Vijeća kad se razmatra izvještaj Komisije isključena je javnost.

§ 45.

Vijeće općine može odlučiti da se o usvajanju izvještaja komisije glasa tajno.

§ 46.

Odluku o izricanju sankcije donosi Vijeće općine većinom glasova od ukupnog broja vijećnika u skladu s Poslovníkom Vijeća općine.

X – SANKCIJE ZA KRŠENJE KODEKSA

§ 47.

Za povrede odredbi ovog Kodeksa mogu se izreći slijedeće sankcije:

- Javni ukor I – stepena
- Javni ukor II – stepena
- Javni ukor III – stepena

§ 48.

Uz javni ukor I – stepena izabranom zvaničniku se odbija 10% od naknade za obavljanje funkcije u tri naredne sjednice od dana donošenja odluke Vijeća, odnosno 10% od plaće.

§ 49.

Uz javni ukor II – stepena izabranom zvaničniku se odbija 15% od naknade za obavljanje funkcije u tri naredne sjednice od dana donošenja odluke Vijeća, odnosno 15% od plaće.

§ 50.

Uz javni ukor III – stepena izabranom zvaničniku se odbija 20% od naknade za obavljanje funkcije u tri naredne sjednice od dana donošenja odluke Vijeća, odnosno 20% od plaće.

§ 51.

Ukoliko Etička komisija utvrdi da su navodi podnosioca prijave neosnovani, podnosilac prijave je dužan da plati troškove postupka čiju visinu utvrđuje Etička komisija.

§ 52.

O izrečenim sankcijama za povredu ovog Kodeksa vodi se evidencija u Stručnoj službi Vijeća i Načelnika.

§ 53.

Novac prikupljen od izrečenih sankcija bit će usmjeren na račun JU «Dom i porodica» Zenica.

XI – PODRŠKA KODEKSU

§ 54.

Izabrani zvaničnici će se upoznati sa sadržajem ovog Kodeksa i njegovim principima.

Izabrani zvaničnici potpisat će izjavu o prihvatanju kodeksa.

§ 55.

Oobaveza je izabranih zvaničnika da svojom aktivnošću osiguraju promociju ovog kodeksa u javnosti.

§ 56.

Ovaj Kodeks bit će objavljen u «Službenim novinama Općine Zenica.

*Broj: 01-
Zenica, 28. decembar 2007.*

**PREDSJEDAVAJUĆI
VIJEĆA OPĆINE ZENICA
Milenko Karović**